

## Mrixi Pirana

Xani gosha gajeru gepkoxamkojejixirutu pirana nunkakletanu. Muchinanu mrixi. Mrixi klustugataa rixmaneta, ga wa gipixi. Klatatsaglegataa rixa wa gimta. Ga wa gijixi, kshoterjixi pixka rixa. Ga wa kochijripna pixka rixa, wa prachi kochi. Wale-ygi pixkakoxa rixa. Seyni gi wa kanshiru wale. Ga wa gopixkaklu wa mrixi. Ga wa konaji nika. Gosha gajeru kajirujikoxa nika. Ga wa kapna rumkajetya. Wa gagmuna yawnakalu, wanepna rumkajetya wa mrixi. Ga wa mgalujpa kawjeta, gosha gajerujpa. Gatliri niikoxa wa mrixi. Rannapotutlu wa gatliri. Wane nushini ginkakletpiranatlu wa mrixi.

### Gepomgalkaka:

1. ¿Girujripna pixka rixa mrixi?
2. ¿Gi pixkamanru?
3. ¿Klu nika wa mrixi?
4. ¿Gi pixkatsagleglu?
5. ¿Gi pixkajixlu?

### **Giyalu Pirana**

Giyalu pirana nunkakletanutnaka. Wane rixa wa giyalu. Mrixi yogniklu wa wale. Klatakotataa rixa wa giyalu. Ga wa gixoluru yana wale. Gi wa rapalushata. Gi wa mrixi pixka rixa. Gixo, galukta pamyomole, satpacha, waka satpacha pamyomole rixa. Wane rixa yanreta wa giyalu. Payakalutni. Gi wa rupalata. Gi wa mrixi pixka rixa. Klatamyonotastsii rixa wa tsrukakalu. Ga wa mtserkakatkoxa giyalu wane; ksajimyonotlu wale. Koshichineru chinka ksajimyonotalu. Ga wa tsrukakalugiyalu, manxineru chinka wa wale. Wane nushiniginkakletpiranatlu wa giyalu.

### **Gepomgalkaka:**

1. ¿Girni wa tsru, mrixi waka giyalu?
2. ¿Gi pixka rixa yanreta giyalu?
3. ¿Gi chinka wa mtserkakatu giyalu wa ksajimyonotalu?
4. ¿Gi chinka wa tsrukakalu, klatamyonotalu?
5. ¿Gi pixkakotlu wa giyalu?

## **Mgenoklu Pirana**

Xani mgenoklu pirana nunkakletpiranatanu-tnaka. Mgenoklu, tsrujiwurni wale, ga wa kayonalni. Ga wa kyowiklu, gosha retikoklunu. Ga wa namatini klatatskeroygita rixa wa mgenoklu. Ga wa ruyliylishaptota. Wale kownanjerewatya. Ga wa kagiturupje nika, gosha gajeru, ga wa klunerukokta. Shimkoxa retini, shimkoxa nika. Ga wa yineru pixka rixanshinikanuta wale. Kanshinikanurni. Giyagni gi wa psolgogneko retka. Gikta rixinipje yoptotka wa mgenoklu. Ga wa kgimatgojrepotlu. Rumata yogimpotuta. Waneru mapa pixkalutu mgenoklu, ksajiru, serolu ga wa kayonalu. Wane rixa mgenoklu.

### **Gepomgalkaka:**

1. ¿Klu nikachrini mgenoklu?
2. ¿Gi ge kyowiklu wa mgenoklu?
3. ¿Gi pixkaygiru?
4. ¿Gipsojiwlu?
5. ¿Gi pixkalutkakni wa mgenoklu?

### **Kachonale Pirana**

Kachonalekoxa yotlotlu yognikalutni. Tsrurunapotni wa kachonale. Gepi pixkalutu wane wa kachonale, ksajiru ga wa sergogolu. Ksajiru giwakni wa panshimleru. Ga wa sergogolu walenwa kachonalpotu. Ga wa ksajiru wane chinka panshimleru, gixolanu rapalushata wale. Ga wa kachonale gixolurni wale. Galukta pamyo waka patsrujire, wane pejnukaklu. Kapna rutakawgeneta. Ga wa shimapjenika. Wale pirana nunkakleta wa xani.

#### **Gepomgalkaka:**

1. ¿Gi pejnu pixkalutu kachonale wane?
2. ¿Gi chinka gapalushatachri?
3. ¿Ginaka rutakawgeneta kachonale?
4. ¿Kluneru nika?
5. ¿Gi pejnurutni wa kachonalpotu?

## Kayatu Pirana

Xani kayatu pirana nunkakletanutnaka. Kaya-tu, katslaknapataa rixa. Kyotmoletaa rixa. Kaya-tni wa kapna gwachri. Ga wa niikalurni. Walekoxa jimeka nikjeta goyecho. Rannapotutkoxlu wale jimeka. Jimekagerkoxni wa kayatu. Ga wa gi wa gogi yotaljeta wale, seyni kapna rumkiya gogi. Chire-tupna ga wa chijipna kashaleru, wane yogimata wa gogi. Kewe gamlutachripje gikshikjetlu wa gogi. Wa kewe gapokinri, gongagapka munanga wale. Gonganga ya. Wane ruylatika. Wale pirana nunkakleta.

### Gepomgalkaka:

1. ¿Gi pixkamanru kayatu?
2. ¿Ginaka gwachrini?
3. ¿Gipapko nikachrini?
4. ¿Kluneru nikachrini?
5. ¿Klunerupje gikshiklu?

### **Kawotu Pirana**

Xani kawotu pirana nunkakletanu. Kawotni satu gosha gajeru. Kewe pixka rixa. Kewe mtserkakat, wane pixka rixa wa kawotu chinkaluru. Pnumukoxa rixa wa kawotu: waneru kayonalu; waneru serolu; waneru kyoprureru; waneru ksajiru. Gosha gajene kewenni wa kawotu chinkaluru. Gi gonshijkakna. Knastsinshiptajii rixna. Ga wa ptowruko gosha gajeru niikoxa wale. Pejri, kayatu rannapotuta wa kawotu.

### **Gepomgalkaka:**

1. ¿Giru pixka rixa kawotu?
2. Seyni ¿ginaka gajerni wa kawotu?
3. ¿Gi pixkalutkakni wa kawotu?
4. ¿Gi pixkanshiru?
5. ¿Kluneru gosha gajerkaka rannapotuta kawotu?

### **Magemi Pirana**

Magemikoxa pirana nunkakletanutnaka. Magemi gi wa psolgogneko retka. Pagognesha gosha yakoklunchi, gowuka yakoklunchi, waneklu retka magemi. Ga wa yineru pixkamka rixajixita. Ga wa gijixi yanya. Ga wa gimyokoxa yanamtya; palnamta. Wane rixa yanreta magemi. Ga wa kewejiipna pixkamka rixanshinikanuta. Gopixkaklu. Ga wa ksajirni. Wale nikanru, gi wa kagituru nika wa magemi, seyini pagixanuplapje nika. Chiretupla, konapla, klunerukokta wa kaplalu, wale nika. Tono, ptowru, ga wa kantsuplakoxa nika. Kochkokjetanru wa gikloya, walenwa nikjeta wa magemi.

### **Gepomgalkaka:**

1. ¿Gi pshinisha gwachrini magemi?
2. ¿Gi pixka rixa yanreta magemi?
3. ¿Gi pixkajripnalu?
4. ¿Gi pshinpixlu?
5. ¿Kluneru nika wa magemi?

## Kachichi Pirana

Xani kachichi pirana nunkakletanu. Kachichi walanwa gixoluro. Ga wa gitokchiji twa. Tpojiwata. Serpojitaa tixa wa kachichi. Ga wa kagruko tixlu wa gitokchiji. Wane taniklu wa kasureru. Ga wa jmererpotni wala. Gogi, goyecho tkamrurewata wa kachichi kasureru tupakinri. Ga wa yine gisanatekoxa tapokini, jimekasure tnika. Taprojetanru ga wa maleplutskigitaa tixkakanru wa jimekni. Tkojwaglewpotuta wa kachichi chinkaluro. Ga wa tkamgagapjeta. Powragaapotu tixlu wa tatnugapre. Satu karetera pixka, karo yapjetyawaka pixka tixgapota. Ga wa gi gepika gixolune pixka tixa. Gixolune yine gimusrutachine, satokamtachine pixka rixanatna. Ga wa kashkalmaklo wa kachichi, seyni tkojwaglewashata. Wane nushini ginkakletpiranatlo wa kachichi.

### Gepomgalkaka:

1. ¿Gi pejnurotni wa kachichi?
2. ¿Ginaka gwachroni?
3. ¿Gi pixkapojro wa kachichi?
4. ¿Klunerugapo pixka tixa wa kachichi?
5. ¿Kluneru tnika?



## **Yotlotlu Pirana**

Yotlotlu pirana nunkakletanu wa xani. Yotlotlu waneru. Kachonale pixkamka rixa. Seyni gi tsruni wale. Wa serpixinshinikanru wa yotlotlu. Ga wa wale, gi wa goshkoxa rawa. Rapga rawa. Ga wa gonu gajerupje nika. Shima, gachijri rannapotuta, machaji ga wa kapi ripa. Wane pejnu rannapotuta wa yotlotlu. Klumchataajru wa yotlotlujiwu. Ga wa kigle pgaynumkogii rixpixita. Walepje nunkakletpiranatlu wa yotlotlu.

### **Gepomgalkaka:**

1. ¿Girni wa tsru, yotlotlu waka kachonale?
2. ¿Ginaka rawa yotlotlu?
3. ¿Klukaka rannapotuta?
4. ¿Gi pixkajiwlu?
5. ¿Gi pixkamanru?

## **Shawashka Pirana**

Shawashkachi nunkakletpiranatanu. Shawashkani yopri pixkalutu. Seyni mturpotni wale. Pwalonshiru wa shawashka. Gimejkoxa pwaalo. Ga wa ksajru wa rogemeji. Ga wa klatajriru. Ga wa kashaalu yopriko pixka. Ga wa sanupje rumwa. Gina-kakta twasagita wa sanu, kmatsuro sanu, wane ruta-kashaleta. Rajiro pgutgimni wa sanu. Giyagni wa Yine wane chinro shawashka gajiro chinrona wa sanu wa kmatsurpotu. Walekoxa shawashka kyimaklerni. Kmatuko pixkalutni. Satumnu yimjeta; koshichine yima, yimgognenata. Ga wa gaxawripa, kewekoxa yimachrini. Tsetse nika. Ga wa serolokoxa nika. Wanepnute kajirujikoxa nika. Gi wa yine gitakle nika. Seyni serolopje kojwakyana wa yine. Waneko nushini ginkakletpiranyegitlu shawashka.

### **Gepomgalkaka:**

1. ¿Kluneru giyagokolutni shawashka?
2. ¿Gi pixkanshiru shawashka?
3. ¿Gi pixkajriru?
4. ¿Klu chinanu shawashka gajiro wchinro wa sanu?
5. ¿Kluneru yimgognenatachrini shawashka?

### **Takgonru Pirana**

Wanekta waneru satu wa shimakoxa nikachri: takgonru chinka. Pakchani, seyni teno ruyakjetya. Pshinkaklu gonu kashichyalo tsro shima. Tsroni shima kapi ripa rujga. Gi wa mturo shima kashicha, seyni tsro shimapje. Ganikajga getko tyapa. Wane runya. Rujrukamtatka, chkojj. Ramganata gowukshini. Wane getkolu galukta gepi minoto ramgapa gitokga. Kashichlo shima, ga wa rumumlikamtlo. Ralnamta. Walenwa takgonru chinka, shima nika-chri.

### **Gepomgalkaka:**

1. ¿Kluneru pixka rixa takgonru?
2. ¿Gipsoloto shima rujga takgonru?
3. ¿Gi pshini gamgalu takgonru wa rujrukamtini?
4. ¿Gi rixamtatka takgonru rumumlikamtinitkalo shima?